

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 445190 23 St
Tuzla, 13.08.2024. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „OLIMP“ dioničko društvo za proizvodnju i promet modne konfekcije Gračanica, ul. Industrijska zona bb, nakon provedenog stečajnog postupka, donio je dana 13.08.2024. godine sljedeće:

RJEŠENJE

OTVARA SE stečajni postupak nad imovinom dužnika „OLIMP“ dioničko društvo za proizvodnju i promet modne konfekcije Gračanica, ul. Industrijska zona bb, matični broj subjekta 1-39, JIB: 4209256800005, račun broj:1321800116010125 otvoren kod NLB banka d.d. Sarajevo.

Za stečajnog upravnika imenuje se Emir Mehurić iz Gračanice.

ZAKLJUČUJE SE stečajni postupak nad imovinom dužnika „OLIMP“ dioničko društvo za proizvodnju i promet modne konfekcije Gračanica, ul. Industrijska zona bb, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 445190 23 St od 10.07.2023. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „OLIMP“ dioničko društvo za proizvodnju i promet modne konfekcije Gračanica, ul. Industrijska zona bb, a za privremenog stečajnog upravnika imenovana je Emir Mehurić iz Gračanice, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 22.08.2023. godine. Iz izvještaja privremenog stečajnog upravnika i navoda datih na ročištu proizilazi da društvo ima dugovanja po osnovu javnih prihoda prema Poreznoj upravi u iznosu od 4.535.279,77 KM, dok iz knjigovodstvene evidencije proizilazi da društvo ima obaveze u iznosu od 376.120,00 KM. Glavni račun društvo je blokiran od 20.05.2013. godine. Radi naplate obaveza po osnovu javnih prihoda Porezna uprava je pokrenula postupak prinudne naplate nepokretne imovine, te su rješenjem o prodaji imovine broj 10-3-01-15-05-08-00346-19 od 20.01.2023. godine sve nepokretnosti prodate kupcu „Interkonzum“ d.o.o. Tuzla i predate u posjed kupcu, osim nepokretnosti k.č. broj 5355/4 upisana u zk uložak broj 1554 k.o. Gračanica, koja je i dalje imovina stečajnog dužnika i na kojoj postoji upisana zakonska hipoteka u korist Porezne uprave. Osim navedene nepokretnosti, društvo nema u vlasništvu imovine koja bi se mogla unovčiti. Društvo nema potraživanja prema trećim licima, uz napomenu da je tužbom zahtjevalo od Zavoda zdravstvenog osiguranja TK isplatu iznosa od 780.063,67 KM na ime refundacije isplaćenih naknada plaća, ali da je tužbeni zahtjev odbijen pravosnažnom presudom ovog suda broj: 32 0 Ps 377676 20 Ps od 30.12.2021. godine.

Privremeni stečajni upravnik je dao mišljenje da nastavak poslovanja društva nije moguć, da postoji razlog za otvaranje stečajnog postupka zbog platežne nesposobnosti društva, s tim da bi za otvaranje i vođenje stečajnog postupka bilo potrebno predujmiti novčana sredstva u iznosu od 15.000,00 KM

prema specifikaciji troškova navedenoj u izvještaju, imajući u vidu da društvo u vlasništvu ima samo jednu nepokretnost koja je opterećena zakonskom hipotekom, tako da ista ne čini slobodnu stečajnu masu iz koje bi bilo moguće finansirati troškove postupka.

Dakle, imajući u vidu datum blokade glavnog računa kod banke sud nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti (prijedlog podnesen 20.04.2023. godine), da je prijedlog dopušten i da postoji stečajni razlog za otvaranje stečajnog postupka predviđen članom 6 stav 2 i članom 102 Zakona o stečaju.

Porezna uprava FBiH, KPU Tuzla je sudu dostavila podnesak dana 26.09.2023. godine u kojem se navodi da je ovaj porezni organ u postupku prinudne naplate izvršio pljenidbu nepokretnosti društva, da je dana 10.01.2023. godine prodao zapljenjenu nepokretnu i pokretnu imovinu kupcu „INTERKONZUM“ d.o.o. Tuzla, osim nepokretnosti k.č. broj 5355/4 upisana u zk uložak broj 1554, koja je takođe zapljenjena, te je objavljivana prodaja iste, ali ista nije bila predmetom prodaje usljed otvaranja prethodnog stečajnog postupka u ovoj pravnoj stvari. Navedena nepokretnost je ranije bila opterećena teretima i u korist radnika dužnika, međutim potraživanja prema radnicima su izmirena i tereti u korist radnika su brisani. S obzirom na odredbe Zakona o stečaju koje propisuju mogućnost istovremenog otvaranja i zaključenja stečajnog postupka, a da Porezna uprava nije u mogućnosti da izvrši eventualnu uplatu na ime predujma troškova vođenja postupka, zatraženo je da sud da saglasnost da Porezna uprava provede i okonča postupak prodaje navedene nepokretnosti.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 06.11.2023. godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama uplate iznos od 15.000,00 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 88/23 dana 15.11.2023. godine, oglasnoj tabli suda dana 07.11.2023. godine i na web stranici suda, kojim se objavama javni poziv smatra dostavljenim.

Nakon što u ostavljenom roku niko od zakonom pozvanih lica nije uplatio predujam troškova za otvaranje stečajnog postupka, sud je rješenjem od 14.02.2024. godine dao saglasnost Poreznoj upravi FBiH, KPU Tuzla da po pravosnažnosti ovog rješenja, radi namirenja obaveza obezbjeđenih upisanim zakonskim hipotekama sprovede postupak prodaje nepokretnosti upisane u ZK uložak broj 1554, broj parcele 5355/4 K.O. Gračanica, u naravi Garaže, Poslovna zgrada i privredi površine 320m², pri čemu su u obrazloženju dati razlozi za navedenu odluku.

Dana 12.07.2024. godine sud je zaprimio rješenje ZK Ureda Općinskog suda u Gračanici broj 027-0-Dn-24-001082 od 09.07.2024. godine iz kojeg proizilazi da je na osnovu rješenja o prodaji imovine koje je donijelo Federalno ministarstvo finansija, Porezna uprava FBiH, KPU Tuzla, broj 10-3-01-15-05-08-00346-19 od 15.04.2024. godine, u zemljišnoj knjizi izvršena uknjižba prava raspolaganja na nepokretnosti upisanoj u zk uložak broj 1554 KO Gračanica, k.č. broj 5355/4 u korist društva „INTERKONZUM“ d.o.o. Tuzla, umjesto stečajnog dužnika kao dotadašnjeg nosioca prava raspolaganja. Na ovu okolnost je ukazao i stečajni upravnik u podnesku od 01.08.2024. godine u kojem se traži zaključenje stečajnog postupka.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, nakon čega je Porezna uprava uz pribavljenu saglasnost suda sprovedla postupak prodaje nepokretnosti radi namirenja obaveza obezbjeđenih zakonskom hipotekom i doneseno rješenje o prodaji je sprovedeno u zemljišnoj knjizi, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.